

## NJOHJE ME SHIIZMIN

### VULLNET MERJA

1- Fjala *shiatu* është arabe dhe rrjedh prej fjalës *mushajeah*. Ajo do të thotë ndjekje, pasim.

Myslimanët shiitë quhen kështu, sepse ata janë ndjekës të Aliut dhe të fëmijëve të e tij pas profetit Muhamed (paqja dhe bekimet e Allahut qofshin mbi të dhe mbi familjen e tij!).

2- Ata besojnë se parimet e Islamit janë: Teuhidi (Njëshmëria e Zotit), Nubuveti (Profetizmi) dhe Meadi (Ringjallja). Ata besojnë gjithashtu se prej Teuhidit është Adli (Drejtësia sipas Zotit) dhe prej Nubuvetit është Imamati (Udhëheqësia).

3- Ata besojnë se dispozitat e Islamit janë: namazi, agjërimi, zekati, khumusi, Haxhi, xihadi, urdhërimi në të mira dhe ndalimi nga të këqijat, dashuria për Zotin dhe eulijatë e Tij dhe urrejtja për armiqtë e Zotit dhe eulijatë e Tij. Kushdo që e mohon domosdoshmërinë e këtyre degëve të Islamit quhet i pafe.

4- Ata besojnë se Allahu është Një i Vetëm e i Pashoq; nuk ka të ngjashëm me Të; nuk është i lindur dhe s'ka lindur askënd. Ata besojnë se Atij i përket gjithçka që ndodhet në qiej e në Tokë. Ai është Krijuesi, Furnizuesi, i Gjithëdituri, i Plotfuqishmi etj. Ai ka emrat më të bukur dhe atributet më të përkryera. Vetëm Atij i takon adhurimi. Cilido që adhuron tjetërkënd përveç Allahut, ai është politeist, idhujtar. Ai është sunduesi i kësaj jete dhe i Jetës Tjetër.

5- Ata besojnë se profeti Muhamed (paqja dhe bekimet e Allahut qofshin mbi të dhe mbi familjen e tij!) është profeti i fundit. Për këtë, ata bazohen tek thënia e Allahut të Madhëruar në Kur'anin e shenjtë në suren "Ahzab", ajeti 40: **"Muhamedi nuk është babai i askujt prej burrave tuaj, por është i Dërguari i Allahut dhe vula e profetëve; Allahu është i Gjithëditur për çdo gjë."** (Sure "Ahzab", ajeti 40)

6- Ata besojnë se Kur'ani që ndodhet në duart e myslimanëve është po ai që i ka zbritur profetit Muhamed (paqja dhe bekimet e Allahut qofshin mbi të dhe mbi familjen e tij!) pa asnjë lloj shtese ose mangësie. Ata i kushtojnë kujdes të madh Kur'anit të shenjtë, leximit të tij, mësimit të tij përmendsh, komentimit të tij etj. Ata kanë shkolla të posaçme për mësimin përmendsh të Kur'anit.

7- Ata besojnë se Islami është feja e vërtetë dhe e drejtë dhe se vetëm Islami është i pranueshëm tek Allahu i Madhëruar: **"E kush kërkon fe tjetër përveç fesë islame, atij**

**kurrë nuk do t'i pranohet dhe ai, në Botën Tjetër është nga më të humburit."** (Sure "Ali Imran", ajeti 85)

**8-** Ata besojnë se ligjet dhe rregullat islame janë ato ligje dhe rregulla të cilat i solli Profeti (paqja dhe bekimet e Allahut qofshin mbi të dhe mbi familjen e tij!) prej Allahut të Madhëruar, siç janë: rregullat e shitblerjes, të qirasë, të divorcit, të martesës, të gjykatës, të dëshmimeve, të trashëgimisë, të dënimeve e të ngjashme me to.

**9-** Ata besojnë se Islami nuk ka lënë asgjë pa e sqaruar. Ata besojnë se politika, ekonomia, kultura, edukimi, shoqëria, paqja, lufta, familja, qeveria, bujqësia, industria e shumë çështje që lidhen me njeriun, nga lindja e tij e deri në vdekje, janë të sqaruara në Islam. Të gjitha këto kanë rregulla të posaçme dhe ligje të drejta. Nëse njerëzit i zbatojnë këto rregulla dhe ligje: **"...Ata do kishin furnizim me bollëk nga qielli dhe toka..."** (Sure "A'raf", ajeti 96)

*"Hallalli i Muhamedit, hallall deri në Ditën e Gjykimit dhe harami i Muhamedit, haram deri në Ditën e Gjykimit."*

**10-** Ata besojnë se moralet islame të pëlqyeshme tek Allahu janë: e vërteta, amaneti, turpi, trimëria, puna, nderi, përhapja e paqes, pajtimi në mes njerëzve, dashamirësia, vëllazëria etj.

Po ashtu, ata besojnë se Islami paralajmëron për moralet e papëlqyera e të ndaluara si: gënjeshtria, përgojimi, tradhtia, përtacia, pirja e pijeve alkoolike, ngrënia e haramit, kamata, vjedhja, kurvëria, homoseksualiteti, kopracia, çrregullimi, zbulimi i grave, mendjemadhësia etj.

**11-** Ata kanë mendimin se myslimanët, me gjithë ndryshimin e tyre në medh'hebe, janë ymet i përbashkët. Ata janë vëllezër në fe, siç thotë Zoti i Madhëruar në Kur'anin e shenjtë: **"Ju jeni populli më i dobishëm, i ardhur në mesin e njerëzve..."** (Sure "Ali Imran, ajeti 110)

Dhe: **"...me dhuntinë e tij u bëtë vëllezër..."** (Sure "Ali Imran, ajeti 103)

Dhe: **"S'ka dyshim, se besimtarët janë vëllezër. Bëni pajtim ndërmjet vëllezërve tuaj..."** (Sure "Huxhurat", ajeti 10)

**12-** Ata besojnë se çdo përpjekje që ka për qëllim përçarjen e myslimanëve, futjen e urrejtjes dhe armiqësisë mes tyre, përhapjen e shpifjeve e trillimeve dhe devijimin e tyre prej Kitabit (Kur'anit) dhe Synetit (fjalët dhe veprat e Profetit (paqja dhe bekimet e Allahut qofshin mbi të!), është e ndaluar (haram) në Sheriatin Islam dhe e dënuar. Allahu i Madhuar thotë në Kur'anin e shenjtë: **"Ata që duan të përhapen shpifjet e**

**turpshme (ose imoraliteti) ndër besimtarët, i pret një dënim i dhembshëm në këtë botë dhe në tjetrën; Allahu i di të gjitha e ju nuk i dini.”** (Sure “Nur”, ajeti 19)

**13-** Ata besojnë se burimet e Fikhut (teologjia) islam janë katër: **Kitabi** (Kur’ani), **Syneti** {fjalët dhe veprat e Profetit Muhamed (paqja dhe bekimet e Allahut qofshin mbi të!)}, **El - Ixhmau** (konsensusi i dijetarëve) dhe **Akli** (logjika).

Nuk është i lejueshëm zbatimi i atyre ligjeve, të cilët janë në kundërshtim me këto katër burime, sepse: **“E kush nuk gjykon me atë që e ka zbritur Allahu, ata janë mohues.”** (Sure “Maide”, ajeti 44)

**14-** Shiiat gjenden në mbarë botën dhe nuk janë të fshehur. Ata, gjatë gjithë historisë islame, kanë patur dhe vazhdojnë të kenë qeveri, dijetarë, shkrimtarë, poetë, filozofë, mendimtarë, shkolla, botime, biblioteka, ligjërues e udhëzues.

**15-** Shiat, po ashtu, quhen (xhaferijetu), sepse Imam Xhafer Sadiku (paqja qoftë mbi të!), nipi i Profetit Muhamed (paqja dhe bekimet e Allahut qofshin mbi të!), u përpoq në përhapjen e diturive të Profetit. Shiiat i morën nga ky imam këto dituri.

Po ashtu, shiiat quhen (Imamijetu), sepse ata thonë se Profeti Muhamed (paqja dhe bekimet e Allahut qofshin mbi të!) emëroi mbas tij dymbëdhjetë imamë, emrat e të cilëve, i përmendëm më lart.

---